

泊鷗山房集

泊鷗山房集卷十一

會稽 陶元藻 鳧亭

書

與鄭板橋書

數旬不接嵇阮悵何可言侔來知足下於今晨已卸裝  
杏園舊寓歡喜無量亟欲走訪苦爲雨阻不能步履而  
西前月於金壽門齋頭見足下所畫殘荷一朵敗荷葉  
一片插在缺口磁瓶內墨汁模糊如有煙光月暈淡中  
自帶野趣夫畫枯不可淡則所貴俗宜避野則彌佳大  
似吾鄉青藤居士醉後之筆壽世何疑邇日可又得數

幅否想攜笈中俟簷溜稍停卽當造謁暢觀先問起居  
不一

與杭堇浦書

兩承賜書下訊僕以右腕爲峭寒所中不能舉者三月  
裁答久稽罪甚罪甚春初得汪西灝札言足下論近人  
詩至僕首屈一指感媿彌切日來端居多暇偶閱殘書  
至作者固難知者亦不易之語而不禁喟然也憶僕未  
交足下時足下過周爰穆齋頭見拙詩一卷謂其思力  
沈雄博厚當屬先達鉅公稿本爰穆笑曰此吾鄉寒士  
陶篁村所爲也足下猶未信覆覽良久拍案起曰斯人

卽不用於世必傳無疑因詢所在扶杖走六七里許訪僕於西湖之漱石居後二年僕客邗江足下亦抵竹西樓下查宣門以夫婦雙壽徵詩啓求足下聞以不工駢體卻之使別倩能文之士且云欲署吾名須覽後始加剗劂宣門句余成稟足下聞出僕手謂宣門曰此君文必佳吾無憂矣不必觀便付梓去夫足下以淹雅之儒負宏通之望生平不輕許人而獨於僕所爲謬賞而信服之雖韓愈之重孟郊賀知章之許李白亦蔑加於此豈真以鄙人著述有合於古不同流俗耶抑譽以試之耶忽忽六年來僕年已將五十每遇文場嬾與經生家

矜觜爪競飛鳴自知終無所用於人世顧念爨桐椽竹  
昭列在人耳目前尚無人取攜而去安知千百年後猶  
有善智識如足下者於蟲魚灰燼之餘拾片語隻字反  
覆沈吟知余所造也箋短涕零欲言不罄

與梁山舟書

入夏來追暑無由聊於敝簾中檢得三五寸蠹牋殘編  
消磨龍夕未稔足下眠食何似蕉雨竹風閒定多新著  
不得過覽我懷如何蕭山汪龍莊爲其母徵求貞節詩  
文幾徧海內每以不得尊作爲憾年來復乞善書者石  
刻吟詠數十篇竊以僕於聲韻之學頗爲識者所許而

足下書法又擅南梁北孔之譽望重一時遂懇足下卽  
書僕之七古窺其意似欲合兩美以表幽潛更足照耀  
人耳目也旣竣石丁裝潢成冊絕類戲鴻堂白雪齋諸  
帖其中當以尊書爲翹楚龍莊抑何幸歟非獨龍莊幸  
甚卽龍莊先節母亦幸甚而僕以下里蕪辭得足下鸞  
翔鳳翥之格着意揮毫藉垂不朽則僕之幸殆更勝於  
龍莊之幸龍莊先節母之幸也湖上木犀開時擬挂席  
西渡此時應可作竟日談筵不知獲遂所願否耳此佈

與鄭誠齋書

正月八日藻白湖上風景殊佳然必得良朋論古談心

流連朝夕庶不負水光山色供養一場自足下西去僕亦卽挂席東歸新正聞敝莊梅花有一枝兩枝開者欣然而至遂拏舟抵南山梅花大盛高高下下掩映崖谷花稀處微露石痕青翠彌妙始知橫斜踈影不必在清淺水中也傳柑節後恐漸有落英願足下早來同坐梅根咏觴數日此佈

與陳句山京兆書

藻頓首奉書京兆大人閣下清晨走謁適華旌赴宣武門不面爲悵藻入京來兩預賓興盛典每出閣卽錄文徧質諸先達皆交口許可野人燕石亦竊自負及榜發

輒低眉汗顏今秋矮屋文章深自秘匿誓不與外人觀  
閣下枉駕做齋曰他人文可不問君文不可不一覽遂  
錄呈青睞不料賞鑒特甚自是一經品題頓倍聲價且  
咸以宗匠所推售宜操券而拙藝虛聲復徧傳都下矣  
揭曉之期於邑無色依然故吾又蒙閣下過慰歎息久  
之彌厚顏甲夫駑駘之馬不能作千里之奔騁櫟之材  
不足膺棟梁之選何敢怨尤顧以大君子顧盼所及獎  
許所加舁鄙之文傾動遐邇仍潦倒沈淪致負惓惓之  
望此所以仰天椎心感途窮而自慟也謹申謝悃藉候  
近祺藻再頓首



與蔡芳三論韓柳文優劣書

辱惠教有韓柳文優劣何如之語僕未能領會來意將  
兩家較量分其優劣歟抑於每家文集中自分優劣歟  
若就一家而言則昌黎之文以碑版爲最平准尙矣第  
篇首一言人盡稱之謂非此不足以鎮壓全篇余竊謂  
昌黎之才力不及古人正在此使匡劉賈董爲之便把  
筆直書必不作此涵蓋語也南海神廟袁氏先廟徐偃  
王廟沂國公廟王太原神道權故相以及曹成王諸碑  
皆古質醇茂卓乎不朽所嫌曹碑後幅掇取人世罕用  
之字而齧牙其句與前半幅文體不合矧他篇又無一

似者自矜其奇適形其陋耳誠則張情河王大理二篇  
奇橫獨絕餘若樊南陽孟貞曜孔左丞張河南孔司勳  
等作亦簡老可法序記書文襍著送鄭尚書之樸老高  
閑廖道之超脫滕王之踈爽藍田之沈頓盤谷進學之  
整齊中丞傳後之雄肆各極其妙答李翱確而不扎祭  
張員外摯而且雋惟五原說理十二郎言情雖滔滔汨  
汨暢所欲言然淺而太直剽而不留於文章紀律已蕩  
然無存評臣論亦羅此病僕未敢許其優也與于襄陽  
李漸東送浮屠文暢溫石處士蕭篇已屬強弩之末宰  
相三書則更糠粃盡露矣河東與許京兆蕭翰林二書

流莊憤懣之氣從慘淡經營而出幾於伯仲龍門童區  
寄傳段太尉逸事狀陽城道愛禍無術詞無從筆一字  
不容增減宋清傳於精審中饒姿致得檀弓公穀之遺  
襲軍堂記如商彝夏鼎古色斑斕王元參朱火次之補  
蛇種樹又次之桐葉優於諱辯論史勝於諍臣至於八  
記雖前人亦稱之然永叔子瞻俱能造其詣何必河東  
反不若序碁鞭賈敵戒咸宜諸短章之有關於世教人  
心者矣如以南家相較昌黎曰笑之則以爲喜譽之則  
以爲憂又曰其皆醉也然後肆焉於行文甘苦可謂專  
且久矣然觀河東與章中立論師道書自序其生平造

詣攻堅抉奧洗伐再三亦非淺嘗薄植者可比且昌黎  
自命甚高睥睨一世獨至河東甘心推讓視若畏友其  
爲勁敵可知假令河東生於昌黎未生之前則起衰八  
代正未知誰任其能蓋昌黎以善縱見長河東以能鍊  
取勝昌黎之博大固非河東所及河東之謹嚴亦豈昌  
黎所得爲充昌黎之量猶難髣髴於西京而盡河東之  
才直可追踪乎東漢鄙人偏好之見如此幸足下裁而  
定之然終不足與流俗人道也

答胡穉威書

藻白三兄穉威侍者今年

朝廷降舉經學之詔初聞大名登薦牘者三甚喜繼聞  
有抑之者奏罷其事甚疑頃接來翰言人壽幾何屢遭  
顛躓沈淪蕪巷自分終身矣想見故人牢落無聊之感  
又甚爲之悲也夫省試禮部試三年一舉而取數復多  
不足重且舉業之文卽上如

國初熊劉韓馬諸公亦不足以見士人之根柢惟博學  
宏詞乃經學曠典也其人非積數十年誦讀淹貫之功  
不能對揚

天子穉威固無媿焉往年應試宏博忽遭暴疾不克終  
場朋舊中交相惋惜詎知十年之後復遭誣受謗有更

甚於疾病者豈非命哉東華塵土閒爲天下才人學人之藪習中博洽孰如穉威筆端馳騁孰如穉威抑之者能阻一時之拖紫紆青必不能滅千百載後績學能文之譽使穉威順風揚帆頃刻閒登諸館閣一切感慨之音不敢矢艱深之語不敢施離奇光怪之氣不敢吐揣摩利鈍求合時宜文能如是之工乎而或列職曹郎分符巖邑簿書案牘役役勞形事冗則學荒學荒則文且日退尤難自強以照耀於後世如今必傳無憂矣其不抑於不薦之先而偏抑於旣薦之後者正天之玉成穉威而非天之棄絕穉威也穉威何憾焉

與姚海濤論地理書

辱惠教星影一編實啓前人未啓之鑰豎論甚超其行  
必遠第言花涇某氏墳旁地美不可得又云平水有吉  
壤其發祥之大不可言惟無買山錢爲苦僕竊有狂瞽  
之見願足下平心而察之夫覓地須從荒山始荒山者  
未經人營葬之處其陰陽動靜向背迴環各具自然之  
跡雖人棄者未必卽堪爲我取然安知人棄者我遂絕  
無可取哉今人之不敢覓荒山者由無卓識必依牆傍  
壁於有人營葬之所而後審之豈知積世積年山之破  
碎已甚彼無祀孤塋綿延而聳者或疑爲連珠泡矣蕭

裡牆土淺薄而浮者或指爲蟬翼砂矣穿鑿爬梳之坎  
一望中凹者或信爲鍋底明堂矣差毫釐而謬千里比  
比皆然尤可歎者時師陋習每至各門先壠輒妄肆譏  
評彼則曰宜再進丈餘更往此又曰若再退丈餘尤善  
甚至在左在右必有一言豈前人之心思目力皆不如  
後人必畱缺陷以待人指摘耶初出矯情轉成痼蔽遂  
周覽於上下兩旁以爲正穴尙在斯也徘徊眷戀而不  
忍捨譬人製一文繡之衣以奉其祖若父有見而豔之  
者欲剗其肩割其袖翦裁其下幅彼子孫許之乎此必  
不可得之勢也不可得而百計以得之小則傷財大則



受辱至得者復失始悔已無及矣花涇之地不猶是乎  
若夫至富極貴之地尤不必勞結於胷中造物之精華  
不輕於發越而人生之德行須自量其淺深使大地而  
可以易致則曾楊廖賴之裔曳紫拖青朱丹其轂者將  
層見疊出而貨殖之豪亦不讓猗頓之獨雄千古矣惟  
曾楊廖賴諸人明知大地之不容倖邀故作鈐記畱於  
後之德隆福厚者安坐而逸獲尙不敢輕泄其真姑恍  
惚其辭以俟識者之心相默印蓋如此其慎也今人之  
學力天資與前人懸絕輒自謂識浮於地而一至再至  
其處遽欣然曰得之矣其不寶燕石爲璠璵者幾希足

下讀書明道有年於巒頭理氣應超出於尋常萬萬然  
得失之理彼此從同平水雖佳竊爲足下不取也

與石東邨先生書

自來穎上違教月餘甚爲思想適欲奉札會承嘉命頓  
釋勞結蒙示方望溪少宗伯所撰二山人傳大類張文  
潛葉水心兩家風格其中雪後偕李睂山過盤山西澗  
以杖叩冰相視愉怡一段能使先生冲淡幽閒之致活  
活潑潑浮在楮痕煤影閒余不識睂山然睂山已可知  
矣注膚斂楷法亦佳不知姑孰鐫手何似畢竟吳門有  
良工宜往求之勿草草也慎夏自愛不贅餘言

答王西霞書

藻白蕭邑離郡城尙不滿百里雲波阻絕思子爲勞承  
札訊殷拳頓解此中鬱結第言百草園素無名流題咏  
倘荷辱臨品題隻字便足不朽僕鄉曲腐儒何能爲此  
園增重謬叨推獎彌滋汗顏去冬有使從北來知二雲  
忽登鬼錄驚悼殊甚已逾半載心猶悵悵不能忘大凡  
朋友之道惟績學而賢者其得之也爲最樂其失之也  
亦最悲當年僕初構泊鷗莊於西湖之北秀水鄭誠齋  
爲崇文山長與草堂僅隔數堆黃葉時相過從玉岑爲  
鄰尤近晤對更密崇安范惺齋以台守來謁上官必枉

臨車騎維時足下與二雲槐塘修武林志乘僑寓宗陽  
非折簡相邀卽移樽而就他若簡齋山舟成山出郭必  
問訊吾廬更生華陔龍莊鳳西輩西渡時則話言終日  
或下榻旬餘此地無蜚樓飛閣以縱觀瞻無妙舞清歌  
以娛耳目然茅齋十笏藥碗數弓鳴禽滿林游鱗初沼  
亦頗饒幽致諸君子莫不素嫻聲韻雅善文章具南金  
東箭之才稟嶽峙淵渟之氣隋珠吐於唇吻卞璧蘊於  
心膺藍輿畫舫絡繹柴門雞黍清樽歲無虛晷亦云盛  
矣曾幾何時誠齋先逝成山謫死新疆槐塘更生玉岑  
相繼俱爲異物其存者或懸車故里或奉檄邊陲卽如

足下由燕入洛不相見者十有九載今得見矣尙不能  
作竟夕之談生睽死訣變幻百端屈指前盟晨星落落  
而泊鷗之古梅樵悴梧竹凋零棟宇全傾不勝斷井頽  
垣之感人隨物衰歟抑物由人廢歟良可慨也蒙索觀  
近著僕年來老病不堪精力耗盡筆墨之事構思已不  
能深入然蕪廢已不獨自今始也自覺閩中之詩不如  
嶺表西湖諸什又不及閩游況邇日哉春閒偶檢先兄  
及亡兒詩稿散失已多並不付梓一二恐卽湮沒無傳  
由是開雕數十首而僕與琬兒軒孫之作亦附其中譬  
蒜韭瓜瓠各占籬邊尺土聊供田野盤餐其不足登宴

膳而佐郇廚也明矣不棄謫陋賜以教言幸甚幸甚

與黃莘田書

藻白數年前在羊城番禺丞何廸亭出示端硯七方皆  
細潤可愛中有風字硯背刻林吉人中翰題辭石尤美  
其明年緬甸不靖廸亭奉檄辦牛軍前卒於路妻子乏  
食流離嶺表三祖法物不知擺折何處僕昨見王漁洋  
舊硯一方蕉白青花中邊皆滿第其青花或密或疎忽  
整忽散與世所稱鼠跡者迥然不同漁洋自題硯背亦  
卽辨論青花所重者在此不在彼僕一過仙霞卽聞足  
下有硯癖賞鑒倍恆流未知此硯與君所藏吳門顧二

娘琢磨者體製何如其論青花是否有見幸一一賜教  
此硯在南臺書肆中足下可往觀之倘愜於心亟解杖  
頭錢買歸勿爲市井中人取去也入秋來連日雨風老  
年人氣軟易爲乍寒所欺珍重珍重

答梁山舟書

藻白山舟太史侍者前月辱惠手教并吳槎客所著書  
昨又承牋訊復及吳函相慰如晤續賜詩塚佳章倍加  
樸老幾疑高岑再生絢爛之極歸於平淡斯之謂矣邇  
日足下眠食何似雨餘日烈殘暑蒸人珍重珍重僕爲  
瘧鬼所侮忽然臥冰俄而抱火如是者七日始少瘥飲

食大減每飯半盂卽止嘗讀柳河東不過數十寒暑便  
無此身之語淒然良久僕今者不過數十昏旦便無此  
身矣憶自入夏以來偶一搆思卽徹夜不寐故凡求撰  
序傳記志碑文者俱堅辭杜絕有親朋問訊起居者嬾  
於相見疾之如仇人莫不以爲怪欲往屋後暫憩小橋  
聽軋輶於喬木視潑刺於澄潭晚風徐來一滌煩悶奈  
窘於足痿形與願違惟詞壇良友或以篇章贈貽遇一  
二名雋之句朗誦數巡怡然終日良由結習未消故不  
覺聞琴起舞耳然又寥寥不易得蒙屬槎客和詩詩來  
乃長篇七古雖別成風調亦足自豪竊謂風雅之藪究



在嘉湖下游如吳門白下鐵甕蘭陵諸處譬求珠者必  
於合浦採玉者輒問藍田伐鄧林之木而大廈斯成取  
泗濱之磬而入音始備理所固然勢亦如是足下世誼  
同年徧江左定有工於詠歌者懇代徵數首宣導吟魂  
同光邱壠則幸甚幸甚日前得黔中詩塚詩十餘首有  
二語頗佳不膚其詞不訛其意確是此題真宰非文塚  
筆塚所能攘而去也其人姓鄭名鋹不知何許人也自  
言聞僕名久矣當亦非碌碌者舍下嗷嗷一載頃者人  
從黔署來所寄不滿革車之數僕始而愠繼而憂復轉  
而甚喜且慰以豚兒苞苴絕跡無暮夜之金可知也夙

蒙垂愛故附聞之全浙詩話一部呈教訛舛甚多校勘未盡雕刻之醜不待言矣外具詩塚記詩各六紙希檢存不宣

賦

梅梁賦

粵若揚州之禹廟兮枕宛委而面陽翼漆宮之窈窕兮接瑤簡之虛堂非泉泓而下瞰兮窆石蹲而在旁近牛斗之星躔兮出泥塗而燥剛玉戶開其詖蕩兮金鋪森其輝煌張蒼牙而啄翠懸璧帶而浮黃燿杳暎以呈麗紛屈戌以流光層植礧崦以錯列踈櫺要紹以相當楹

梧楸桷栴欂栌栱栿東西房序各落攢搶已蒼乎惟喬之  
楨榦無遺乎貞松文梓榎楠豫章蹢躅乎蠃蟻妥帖乎  
鴛鴦其爲梁也拔地千尋橫天百尺澤炫青銅堅凝白  
石蠢蠢祁祁九九奕奕如鳳如虹非香非栢陋玳瑁之  
未工笑芙蓉之徒嫿西京文杏不足顯其雄南郡修篁  
無以增其赫玉梁瓊譎豈姜碓之所覘也銅梁濯瀟詎  
公輸氏之所擇也爾乃工倕冥搜師偃幽討束馬懸車  
伐山開道窮天南之秘區得甬東之靈輿成閭者東嶺  
爭奇合抱者孤山同傲景羅浮之遇姝慕桂林之塞竈  
蓋其崔錯發醜阨衡閭硃實與成都巨質吳興異材爲

造化所眷厚而稱華實焉鬼斧神斤丁丁考考翠蓋高  
傾黑雲遠倒林豁天低山空月縞萬象歡騰千夫鼓譟  
旭送星迎貌馳獅導大廈始興膚功旋報是曰梅梁都  
哉天造爰有藝林佳手畫數靈仙飲墨成癖濡髮類癲  
點之注之潔焉拂焉肖疏勒之所見狀摩陂之所潛殷  
殷麗甲軫軫胡髯睢睢盱盱蜿蜒蜿蜒踴躍跳擲拏攫  
連蜷奔走屬目者莫不厭觀乎蚴蜥狻猊之分置而驚  
駭乎昆明興慶之在前及其吸精華振聾瞽破九隅闢  
百戶出巖居嬉冰府擎香籬披芳杜應驪羣孽乖伍濫  
狀來嶮斯怒此爲王彼爲虜或俯而趨或昂而豎戰拒

中洲擊撞迴浦長鯨漏髓巨鰲摧柱支祁走藏罔象退  
武雹降霾升雷呼電舞腮頷夏摩牙角鈎挂氣鬱腥雲  
汗灑脂雨水白涎精波紅血縷朝亘秦稽之離樓兮暮  
逞威於鏡湖之滸瞻榱桷之淋漓兮覲黼容容其恆數  
彼叢幽之偃蹇兮固蘊抱之有素也登古屋而爲宗兮  
恐未足以平其慕也矧將作霖於九霄兮冒塵寰之久  
駐慨盲夫之無明兮信青眸之必取雖鐵鎖之羈縻兮  
夫又安知其所赴亂曰構雲架曰膚腴崇業奠神宮兮  
錚于後列水劒前陳位正中兮丹青刻畫非虬非螭幾  
化工兮翕闢重靄儼來忽逝隱隆隆兮萬物競新不如

其故輓無踪兮禮宗肅穆春秋瞻仰思何窮兮石船鐵履粗沙蒙黥將毋同兮岬崹嶼嵒嶸嶢嶸窈眇俶傀叢兮大冶鎔鑄元氣蟠鬱爲誰容兮於哉靈域甫邛安衽靡所終兮

廣會稽風俗賦

有客謂余曰昔王梅溪作會稽風俗賦博引繁稱洋洋  
鉅製洵乎不朽之言矣然越事綦繁尙多闕畧宜補者  
十之二攷作賦之年迄今復經六百數十載宜續者十  
之三子曷不廣其說以佐前人所未逮余笑曰是欲竊  
煉餘之石而輕窺不足之貂也余雖生長是邦陋於見

聞已不若梅溪宦游於此者網羅闕遠又何論文采之  
相懸霄壤歟或者千慮一得姑且自忘其愚恐觀者終  
譏其妄也賦曰

維吾紹郡古曰會稽地名由禹城傳自蠡指列宿以鼎  
分位少陽其獨朗控四郡而勢雄布八邑而地廣爲天  
南之樂郊實淞東之沃壤非郭杜其可侔豈梁益兮能  
抗其爲山也峻而不險鉅而不頑盤紆靜穆起伏幽閒  
其爲川也流非奔瀉聚少盤渦千邨有楫百里無波縹  
緲鬱蒼瀦洄綽約如耦停勻映帶錯落顧盼皆別有煙  
霞尋丈卽自成邱壑絕天梯石棧之勞多穩舵平舟之

樂朱華恆麗寒雲自揚龍歸梅渚畔依富塘淵中問馬  
塢畔思航非釀名釀因薑字薑蒲萄之嶺琵琶之洲巖  
號獅子湖云鴉鳩燭憐人而溪曙麻益弩而林稠蒲陽  
則利爭吳越夏蓋則跡邁商周珮環昇兮嶮嶺寂旌旗  
掩兮豐山幽粟米儲兮懷句踐日月闢兮憶錢鏐石狀  
猗猗雙後立化兮潭光潏潏四相同嬉兮漁浦可漁謝  
太守之所濟兮陰山在陰秦皇帝之所移兮三百里之  
爲湖兮豈謫仙之我誑十一山之在城兮非思陵其孰  
知於焉別墅別業錯列縱橫始寧先築遂初後營西園  
則衣香不斷昌園則花氣常盈寓園有懷沙之慟沈園



感破鏡之情職貢吳閫今年年蒙鹿攜樽小隱今夜夜  
鳴箏獵火銷兮樂野廢美人去兮土城傾雲樓敗兮杜  
蘭失羅壁變兮疇苑更惟暢鶴煙蘿遺踪二宕兮猶使  
人過殘山問賸水宛游濠上而聞潑刺於澄泓爾乃文  
槐雕碣映岫迷汀軒名蘸碧樓號來青望烏表瑞呼鷹  
効靈怡怡巖室小小山庭巢書礙步壁帶流馨撫松蠟  
屐答春應星江總賦江彪之宅子安禊子敬之亭履石  
田而芝滿叩梅舍而雲扃離臺燕臺兮風月競駕臺之  
勝香閣書閣兮雲霞分釣閣之形則見半月韜影五劒  
騰芒釣車樸屬仙骨昂藏峨峨筆塚沈沈筆倉印浮江

面感舊墨湯沼以呈祥屐鐵奇爭於履鐵玉梁靈勝乎  
梅梁更有百齒之梳六角之扇太真之琴織女之絹磬  
玉如編鞍珠成串虎枕則七寶座掌藤盤則五光隱現  
舜石洪磚周洗秦硯刻壺孰題許瓢爭銜換鶯有帖鬪  
草有鬚幻矣珠口傷哉酒顛識于闐之易寺驗梯命之  
應符石懷松兮鱗古水入畫兮聲麤廣陵曲兮傳復絕  
青藤葉兮菱復蘇賞鑑湖之番音兮遇獨孤而頓失笑  
苧蘿之紅粉兮唯王軒之是娛以言陵墓則冬青穴義  
薄穹蒼運當子丙時惟馬羊金鼻將失玉骼難藏寶匣  
之蛟龍輾轉橋山之弓劍淒涼斷六更之譙鼓感一騎

之天香後之人第悵攢宮地裂誰能辨岸谷核滄桑蹠  
磧礫撥榛篁訪珠邱於蘭渚而識金粟於天章以言水  
利則應宿閭功垂勿替三邑交資萬畝均濟星斗森羅  
山崖根蒂水測盈虛洞分啓閉訇磕砰磅澎湃溶漓捲  
雪奔雲目眩神逝溯馬臻之遺愛兮再見黃堂豈欒郤  
之後昆兮何來阜隸飛潛動植前賦言之詳矣然猶有  
異而未彰者比目含肚四腮半面鰲狀如刀鰻形似線  
梅魚上而梅芬雪姑鳴而雪見或拖練於林杪或追紅  
於水邊生白麋兮三足養赤獮兮百年木解相思芝能  
辟穀貝多則植自寶師薈薇則傳來西竺試賞乎高館

之堆藍兮應笑黃華之碌碌匠巧工良尤多用物創理  
之紙曲柄之笠爛如寶街皚爾白疊夢裡耀花宮中秘  
色青甕宜茗棐几可書湘湖土甓陶堰竹爐牛車耳水  
單氏權輿惟彼飲食亦可類推賀求湖米樊約山菜柿  
狸秋貢社豹春回蟹隨棟盛鮑待桃開義安之禾兮收  
獲先於一郡東浦之醞兮沈酣徧於九垓至若越路之  
茵爲肴最嘉石耳石芥吐雲納霞九熟之棗五色之瓜  
姚江乳餅嘉酥並誇千林夏熟解渴偏宜惟白最美有  
線尤奇荔支品重嘉名是貽不獨官長之擅譽一時也  
玉版非禪可羞可薦曰簪曰花曰猫曰燕笛簫簪包罔

原殆徧不獨箭里之堪爲世羨也赤實朱苞火珠驪吐  
家有木奴富等千戶昔傳謝家小者特著今產道墟味  
如甘露又不獨蕭山陸吉之彌漫園圃也至於熬波煮  
海雪積諸場篋盤懸而火不灼石蓮試而滷可量此枕  
溟衽渤之邦咸攬其利不足爲越重也姑識焉以昭食  
貨之常故夫山川映發應接不暇王中令所神怡也公  
私宴安百度饒羨陳都官所心飫也然不聞虞功曹之  
言乎海嶽精液善生俊異則千巖萬壑扶輿清淑之氣  
不鍾於物而鍾於人其弼於中也如貫虹羅宿而欬乎  
天漢之津其彪於外也如豐隆列缺礪礪爛熠一發而

駭懾乎八埏之民掄元奪魁不足以稱士建牙列戟不  
足以稱臣仁孝則遇寇代死擊官復讎力甘竭於眾虎  
臥遑恤乎荒邱篤行則建業赴千里之期浣水得五男  
之報憫窮餓者望爨火而樓登避權門者誚猢猻其樹  
倒循良則羅珣顧臨並畱嘉績胡沂黃度咸昭直聲或  
擊魏而南戍或劾劉而西征謝文正克稱賢相魏文靖  
何媿名卿朱燮元之整旅猗猗功侔銅柱周養浩之籌  
邊山海勲埒長城忠烈則罵賊而弟兄偕殄守陴而長  
幼俱戕肢體隳魚然之獄衣冠沈魚鼈之鄉樹四諫之  
先聲兮獨年深乎犴狴著三入之好事兮誰血濺乎衣

裳痛純甫之鈞奸兮憤同繼盛惻念臺之殉國兮志類  
天祥暨夫彪佳元潞邦曜鳳翔莫不唏噓社稷而垂大  
節於堂堂儒林則迴開謙浙塾堃光徵潘太常乃士林  
圭臬韓莊節亦鄉閭準繩石簣石梁二難交勛王畿王  
艮一脈同承文苑則宮體可變秘書尙傳宋雅之什東  
山之篇若寬若績頡頏後先隱逸則遁歛惟陳潛吳曰  
戴得魚置親故之門辭米有賢釐之配膠膠乎何爲豁  
衍幽丁之閒白雲先生在焉復有照水徵君畫梅高士  
鐵笛騷人藍衫才子靈產風角赤松手談十里先見三  
家合參懸黃金而遠購稱能品而無慙其游於方外者

劉宰官則樹高人遠陳院長則眼碧頭蓬簡長超九僧  
之列湛然冠六寺之中其著於閨中者地下感驅狐之  
早庭前誇詠絮之工或棄華以昭德或克敵以成忠或  
身殞於背腐或音開於淚紅楊妹子擅椒房翰墨沈將  
軍稱巾幗英雄彼景蘭之侍櫛金童兮無雙國色惟文  
儷之傳經紗幔兮第一門風若夫鍛比翼挫交柯誓從  
一矢靡他自虞吳兩母屠張二姝之後捐崖汨水投繯  
觸戈未嫁而貞旣婚而節者詵詵焉總總焉幾比沙數  
於恆河他若金龍六五乘雲馭虬恍兮惚兮揚靈水陳  
能驅河伯能禦陽侯肥蠟罔象咋舌垂頭羌拯九死於



一髮兮何虞乎溷流渫岸而焱颶驚舟然而詩學之偉  
莫若放翁六十年長吟牖下一萬首獨步江東製春雨  
杏花之篇兮早傳紫禁讀王師北定之句兮始鑒丹衷  
雖李白之克肖實少陵之是從殆超四靈殊二派冠中  
興諸彥而卓然爲南宋之大宗德業之鉅莫如文成有  
體有用克言克行講學闡良知之旨運籌操必勝之兵  
巢室免鴟鴞之破封疆弭烽燧之驚先三泖而戡亂終  
九華以葆貞宜朝廷綿其血食史冊垂爲國楨今

天子猶寵諸隔代奠以前楹煥

宸章之錫而標名世之榮若其入境而易見者十樹一

邨五樹一塢耕不弛疇織無息廡誦之聲連閭閻戶  
無閒城鄉無分樂苦咸禮讓而循循宛當年之鄒魯夫  
風俗之美原不扶自直不斲自雕矧有皋羽霽山之儔  
犁眉子充之侶氣節文章倡予和汝來寓於斯久歷寒  
暑復爲朱紫陽施教之邦趙清獻臨民之處或立雪而  
南來或載石而西去其觀摩也如彼其薰率也如此遺  
韻流風詎無所補歟逮乎

國朝鍾靈毓英三張聯轡二徐爭衡前輩擴名流之社  
他鄉堅死友之盟姚少保息鯨波於臺廈吳中丞掃豺  
穴於寧平黎洲隱而淹通兮一朝文獻西河徵而博洽

兮萬里知名玉映軼乎昭華兮女史握丹鉛之妙肇杞  
同於洪綬兮畫人垂縑素之精其閒識五收兩界之原  
膺七步八乂之選摘麗句吐清詞者殆多多而益善雖  
詩巢二十姓之人未見一斑卽越風三十卷之編僅窺  
半面此吾桑梓之大凡也蓋自被

列聖深仁之育沐

九重化之敷旣漸摩而砥礪彌感奮而勤劬洪惟

聖祖省方越區我

皇繩武載巡海隅湛露沛於蹕路

清問及於里閭玉書赫其靈啓東箭煦而榮舒儼乎禹

會於山之塗有神南鎮効嵩三呼橫經之彥抱布之夫  
陳謨製頌擊壤歌衢濟濟翼翼喁喁于于麟麟炳炳藹  
藹愉愉以醇以厚以蕃以膚今之越有更勝於古之越  
者雖使作越問刻錄先達後賢傳諸人復起而操觚猶  
恐未能潤色鴻龐鐫鑿幽窅豈鄙人所能鋪張揚厲而  
一篇之得以罄其馥竭其腴也哉聊吮枯毫畧言陳述  
愧彼前賢謝爾嘉客

泊鵑山房集卷十二

駢體一

會稽 陶元藻 鳧亭

序

沈西村詩集序

望月高秋競傳東陽八詠贈人古意首推詹事一篇家  
學工詩由來舊矣矧其才思鴻朗吞篆可比誦讀專壹  
漂麥不知高華記室尺牘則重於陳遵磊落參軍奏議  
則逾於陸贄嫺兵刑錢穀之事作公卿將帥之師雖經  
濟見諸代庖而詠歌鳴其自得固當有體有用非風雲  
月露之虛宜古宜今同布帛菽粟之貴聿超眾籟克張

我軍其在斯乎夫四始六義時事之所見徵也入又七  
步性情之所託響也自昔挑鎧發篋有卷撐腸揮塵談  
經無人折角方將騁騏驥以驟康莊上崑崙而捫霄漢  
矣詎料桐焦在爨賞音乏聰護屈於泥騰空無力獻連  
城而屢刖挾照乘而暗投魯諸生誰以禮交楚重瞳爲  
之泣下其不遇也旣如彼且復智井波生城門火及凶  
將至於滅頂災實切於剝膚銀鐺千里何堪戴盆之冤  
昭雪經年始免覆巢之禍如雞之命伍死之身怒雨駭  
霆茹荼萬狀其顛沛也又如此而乃不怨不尤以風以  
雅融融洩洩絕無危苦之音坦坦施施彌見和平之奏

豈非養氣功到瑕類消於有素讀書詣邃渣滓化於無  
形者哉若其泛渤海陟岱宗走上黨過大梁無諸之所  
都趙陀之所據竿夔之所聚獐獐之所居莫不共其寒  
暑歷其高深以故鞭絲帽影酒闌燭跋之間嬉笑盡文  
章咳唾成珠玉較之閉戶掉頭季鍛月鍊者奚啻霄壤  
司馬遷之足跡穿穴九煙向子平之曾襟孕鑄五嶽以  
今視昔何獨不然僕之於詩也窮而不工老且彌拙二  
十四品畧辨酸鹹三百五篇未窺津筏竹籬茅舍之處  
枉臨故人松風蘿月之下出示佳作不鄙荒陋屬題卷  
始循環哦繹載深嘉嘆如遇波斯之舶奇采騰越參薈

荀之林妙香細縕者不可勝記焉迦陵仙樂問當世詎  
無解人璠璵魯寶卜他年定多識者

施淡吟見月集序

蕪湖施淡吟幼而多慧名重楊梅長卽工文才高鸚鵡  
茶檣酒幔出入於螭磯采石之間藥碗詩瓢來往於絳  
雪蛾睂之下製銀箏之十部付與紅綃按檀板兮三更  
教來紫玉引商刻羽減字偷聲樂此不疲其他何慕雖  
金城煙雨當年戴笠而游鶴市鶯花幾度吹簫而過姑  
蘇臺畔心傷野鹿之鳴芳樂園中腸斷銅駝之泣然而  
風塵尙淺樓頭不咏刀環井里匪遙旅邸頻逢錦鯉從



未有風晨月夕眼着花落花開帽影鞭絲行盡江南江北雪兒長別祇愁金鏤銷殘桃葉離居莫解王孫辛苦如乙丑之游者所以香生鵲鶴粉落芙蓉寄言松菊空存託想尊鱸不得短長亭下濕司馬之青衫斷續雲中唱西莊之紅豆也若其三峯似畫兩水如羅窈窕黃山響寒松之秋汐嵯峨白嶽挂春水之珠簾尋花經神女祠前洗馬看司空原上杏花村館倒酒甕其猶香玉鏡溪潭拗菱絲而未斷非無游騁盡變蒼涼心爲思鄉集名見月嗚呼誰能自遣我見亦憐鵲無恨其何啼天有情而亦老陸平原麗句半成道路之閒庾子山新詞盛

在別離之後一聲河滿幾疊陽關總由感慨居多大抵  
悲哀爲主僕本恨人偏多秋氣陳根難戀朝朝作浮梗  
之形孤影空依夜夜切轉蓬之想非馮驩而彈鋏異王  
粲而離家陟屺三年頻添衣線望雲千里莫答春暉以  
吾所懷非君之意然而感羈旅慕邱園其情一也駒輕  
過隙雪易盈頭空囊僅羞澁之錢岐路值抑揄之鬼功  
名潦倒要知我命不猶琴劒飄零休說人生行樂無端  
嗚咽聽三聲巴峽之猿何限淒其唳一陣衡陽之鴈

恭紀

聖駕南巡詩序

臣聞協時正日紀懋績於尚書設教觀民樹芳型於易  
象百神赫濯崇時邁以懷柔萬國超踰大敷天而裒對  
森羅鹵簿壯旌門桂栒之容羽翼鸞聯備瑞節邊璋之  
職雨師灑道駕太乙之鸞車風伯清塵闢天靈之威路  
歲蕤飛旆依玉斗以廻旋蹀躞鳴騶傍珠衡而擁護凡  
皆修五禮問百年審銓衡同律度親列辟以觀風啓明  
堂以展義也唯我

皇上乘乾立政無逸爲懷金甌奠而泰階平玉燭調而  
垂裳治晨臨花暖運四氣於蘿圖座映宸高納八紘於  
淵鏡若泰嶽若恆嶽若嵩嶽承景鑠而夔鼓先鳴爲充

泊鵲山房集卷之十一  
州爲冀州爲豫州敷體化而螭輪並駐陽春有腳旋施  
溫渥於江淮大造無私遂荷寵綏於吳越遇  
璇宮之週甲萬壽無疆維

楓陛之勤民一人有慶爰以視海觀河之舉申此承歡  
祝嘏之情勞

玉趾以遙臨奉

金根而遠出麗護葩於華渚堯母門高訪瓊笈於崆峒  
軒車日迴唐弓楊葉夜掩烏衣天馬蘭筋晴籠黃帕花  
明柳暗繞八鳳之珠旂風正帆懸渡雙龍之畫舫攬時  
和於原野草木生春閣道泰於山川飛潛食德漁莊蟹

含影堆長樂宮前酒幔茶檣景集宜春苑外滿城雅管  
聲聲和王母靈禽夾岸華鐙處處映嫦娥寶樹玉船銀  
甕榮光直射乎麟洲璧月珠星瑞氣遙通於桂海先頒  
大詔國賦均寬載降

恩綸儒林益勵珊瑚鐵網一時倚馬之才翡翠書床幾  
處臨軒之試負暄商戶擊壤農家支祁則跡歛波濤細  
柳則光生組練琉璃帳裏占來益卦三爻藻火衣中繪  
入豳風七月蓼蕭與湛露齊陳魚藻與裳華並賦大江  
南北樂附鳳而攀龍兩浙東西快瞻雲而就日仰  
慈闈之晉福尊親備善乎養親繼

祖德以揚休後聖同揆於先聖豈非圖披清洛舜抱符  
深碑刻峒嶺禹功協鉅六飛琴麗規乾則以陶鈞七萃  
鱗編矩坤維而涵育者哉臣曾叨視學忝佐司戎遼陽  
草碧扈豹尾以鳶翔晉水楓丹侍霓旌而鵠立重逢

大典彌仰

皇猷巽風固有物皆噓兌澤亦無川不潤雕題漆齒航  
海來迎烏弋黃支梯山入覲魚魚鳳綬紛虎拜於堯封  
業業貂冠鬱雲從於周道景凌霄之飛蓋心切鳧趨聆  
動地之文輶情殷葵向管鑊青玉竝

帝陛以廣揚牋劈紅桃附卿僚而獻納抒誠一寸賦韻

十章

蕭山方明府贈行詩序

時當蠶市鶯欲遷喬節過花朝星將移次錦帆高挂離  
情在楊柳磯邊班馬齊鳴別緒滿蘼蕪陌上動華旌於  
灞岸穆如猶想清風聽朝雨於渭城樂只彌懷君子藕  
塘老父臺題樓賢裔植荔雲孫聲華則皖口名流閭閻  
則龍眠望族葵傾紅日近光銅馬門前鳳慕高岡寄跡  
桑乾河畔曾操鉛槧入窺四庫之書應敍賢勞出備六  
曹之選及鋒而試卽禱雪於章安借箸以籌將哦松於  
檣李昔沈酣兮蠹簡詞壇夙仰班張今揮霍乎牛刀敝

邑幸逢卓魯訟庭草長貫索星空官閣犀燃豺狼跡少  
四知畏夜冑居染指之嫌五斗甘貧常凜焚身之戒抱  
玉壺而冰淨朗月增輝對銀漢以波澄浮雲絕翳諮諏  
邑彥祗緣求治惟殷砥礪時英專以衡文爲樂界烏絲  
而點畫不離筆硯生涯吟紅藥以推敲迴異風塵俗吏  
詎料三年墨綬遽及瓜期十笏琴堂竟同傳舍迎來竹  
馬猶興何暮之歌憩到甘棠忍見將離之贈僕夫整駕  
潭水浮花頓使西陵翻成南浦梁園舊客出郊而金勒  
齊銜魯國諸生繞旆而青衫盡濕走兒童其繾綣幾欲  
牽衣感父老以倉皇咸思臥轍藻也菰蘆下土入世踈



慵風燭殘年杜門頽廢嶺雲豈少人可贈而自怡宰室  
非遙事雖公而不至溯神交之篤摯解佩無由徒目送  
以纏綿望塵弗及杖扶邛竹似停謝朓之驂口獻巴詞  
聊當繞朝之策

壽王隱園八十暨子雲莊六十孫勿齋四十序

蓋聞長庚星朗一門添海屋之籌綠野堂開三世衍箕  
疇之福緣履醇而宅粹厚厥栽培宜創後與因前同其  
貞固挺珊瑚於碧澗自無柔脆之枝產瓊玖於崑岡盡  
挾清剛之氣人疑荆楚詎有仙家我識瑯琊定多仁者  
恭惟隱園太姻伯大人司徒妙裔內史華宗本槃澗之

高賢作天山之逖叟觀碑太學懼免俗之未能採菊東  
籬遂辭榮而不出茶檣酒幔秋風泛鷗鷺之邨筍屐棕  
鞵春雨赴雞豚之社贈綈袍於范叔慷慨偏多施麥飯  
於韓侯纏綿不少霜侵華髮正值太公釣渭之期水剪  
方瞳恰符富弼題屏之日羊車竹馬庭前則會食森森  
寶輶珠鞭床下則問安磊磊畱典型於鄉國魯殿靈光  
懸模楷於人倫周京石鼓然而介胥明允不聞玉局同  
時獻壽蒼梧未必太常接踵何圖濟美齒與德而俱尊  
更喜貽謀學與年而並茂雲莊公邱錦羅留江花在手  
勝衣卽解對楊梅毀齒便工摘鸚鵡孝廉畫舫曾呼真

長之家司馬青衫不送潯陽之客飛五番之鳧舄澤徧  
甘棠障九曲之河流功懷砥柱梅花乍馥序屆嘉平鶴  
算何長歲周甲子雖蘭陔定省子無稱老之文顧蓬島  
淵源代握延齡之術攀茆隄岸敢云我獨賢勞視膳庭  
闈僉謂翁猶矍鑠永其年永其祿仁里休徵教以孝教  
以忠天倫樂事勿齋先生後學長城諸生祭酒文壇戰  
勝咸觀壁上旌旗學海源深時湧毫端珠玉惟吳廚邊  
筍穿穴無窮故姜被田荆裁成悉妙聞詩聞禮早能領  
袖三千惜寸惜分頓覺鬚眉四十孟亭瀟灑畫像方宜  
羽扇飄飄畫江亦可屏開翡翠埃延乃祖之賓杓號鸕

鷄先進而翁之酒羨克家於膝下奚媿方剛樂繩武於  
樽前真稱重慶則見九枝絳蠟疊膩歡腸兩代瑛衣各  
開笑口所異位分河洛俱昭十數之盈尤誇夢入熊羆  
並著廿年之隔團圓華屋得三壽而非朋盤鬱靈椿紀  
千春其有歲始識仲宣樓上箕裘皆夏鼎商彝誰知摩  
詰莊中几榻卽香山洛社前期親串未醒酩酊而來後  
至朋儔又拜彭錢而去孤懸一一滙成長幼良辰燕賀  
重重傳作承平佳話某社共枌榆居鄰桑梓嬉游卅角  
會隨禊事之修涉獵蟲編夙佩潛夫之論矧以雕龍令  
子助雲筆硯之交繡虎文孫秦晉絲蘿之託一官匏繫

揚觶無由兩浙萍浮躋堂未獲蔚雲霞於崧嶽生甫生  
巾崇閭閻於烏衣如龍如鳳願百歲無邊風月常承南  
極之輝料三冬不斷笙歌總是長生之曲矣

啓

雙節徵詩啓

朱仙歸馬岳少保以父子全忠白鵲盈閭楊鏌射以祖  
孫稱孝彼鬚眉而有志詎巾幗其無人兩劈金菱隔世  
之孤鸞競舞重摧玉樹一門之寡鵠無依法乳流哀峨  
嶠雪積凝香續恨太華松連何殊埋翡翠於田閒婀娜  
並烈墮胭脂於嶺畔老幼同貞既垂蒲媛之文宜製龍

娥之句如吾蕭謙吉王君淑配乃某曹先生女也錫田  
王君佳耦乃紫庭何先生女也以曹視何則爲婦之婦  
以何視曹則爲姑之姑今昔稱接後先濟美是可傷矣  
尤足述焉曹大族紹東阿支由西蜀方拈謝雪綽有  
林風自叶秦簫彌高鳳曲五年燒燭琴書偕蠻錦之機  
一夕分稠薑橘漬春盤之泪有花鈿而不飾惟蓬首其  
如飛魚沈寒水薦入尊嫜蘋捲秋風供來宗祏忍摩呵  
之辛苦願學程嬰看頭角之崢嶸居然趙武而乃蠶絲  
吐盡鵲血啼乾衰草孤墳思結鴛鴦之帶殘奩宿粉亦  
成蝴蝶之魂何孺人賦菊吟椒敦詩嬾禮家尊則名區

製錦夫子則太學觀碑洗纖手以爲羹脆分孟荀挽鹿  
車而出汲甘挹姜泉羅襪裁雲望切終軍之奮犀錢簸  
月尤憐阿買之雛其柰薤露先晞銅盤頓折淒其割荻  
閨中似有淵源竭蹶持門世上偏多偃蹇雖嫵嫵此日  
已經霜雪盈頭而廩廩當年詎易韶華過眼嗚呼峯瞻  
雁宕幻出千形水到潯陽變成九派李將軍威行上谷  
悔生失節之陵秦長史巷戰蘄州羞繼無君之檣薰蕕  
不一寧云前事堪師清濁無常或亦後來居上茹荼飯  
藥固異霍家二婦誼等弟兄截髮磨笄又非裴氏諸嬌  
氣聯母子所嘆繩其祖武祖偏壽促顏回詒厥孫謀孫

又鬼鄰李賀巴臺蠹漢未圯懷清渤澥橫濤再逢精衛  
彼倡此和金攀貞女之枝地久天長各煉媧皇之石豈  
非栢舟相望泣甚湘絃寶瑟遙承傷逾衛瑟者乎是以  
下符輿論上達

宸聰優渥

恩綸日映蛟龍之氣巍峩綽楔雲盤鼉鼉之形封馬鬣  
者應鑒酸眸昇板輿者始開笑口伏願鴻都貴客虎觀  
名流牙管齊抽魚牋競劈以南以雅紛飛杜曲瓊花或  
賦或騷亂灑平陽銀豆則如鐫彤史勝繪甘泉蘭在谷  
而彌芳竹有斑而益紫烏衣巷裡長懸照乘之輝白玉



樓頭下聽鈞天之奏

查宣門五十雙壽徵詩啓

蓋聞雲高崧嶽挺生標世上之英日麗魚軒克相擅房  
中之譽侶神仙而採朮原有劉樊驚伉儷以齊眉寧無  
梁孟鹿門偕隱早傳益壽之方鳳管同吹新譜長生之  
曲須知銀漢星自雙輝何必藍田松纔對樹香雨查老  
先生駕湖望族鶴渚名家門楣則畫戟三重世系則金  
貂七葉楊梅解對弱齡而炙啖牛心鸚鵡工篇綺歲而  
扇貽鸞羽播聲華於吳地東箭南金問子弟於王家優  
龍劣豹咸謂蘭芽之茁永叨槐蔭之餘而乃賦命不辰

遭家多難魂飛湯火幾無完卵之巢聲震雷霆宛索枯  
魚之肆啓重關於半夜莫遁田文求複壁於故人誰藏  
張儉網開一面感雨露以何深春轉三陽受帡幪而特  
厚分符劇邑在太行王屋之閒出宰名區鄰向秀山濤  
之里睠雲霄之路近有舄皆飛攬城郭之風清無花不  
種簿書鞅掌當芻午而游刃偏餘撫字催科經盤錯而  
操刀更敏賢勞百里大吏交詡其能擘畫三年黎庶羣  
謳其德是誰謠詠遽瀆天邊使彼珊瑚終沈海底才人  
失職濕錢一領青衫壯士羈游看徹二分明月雷塘煙  
雨茶檣與酒幔齊陳板渚鶯花鍛竈共匡牀並設羣公

束帛歲歲盈門列府徵書時時接踵獻縞投紵盡國僑  
季札之交合社分壇多王粲陳琳之侶謙冲可挹固宜  
物望全歸倜儻非常應識君才十倍然胷中邱壑雖無  
藉於他求而室內經綸恰偏資乎內助錢太君裔由武  
肅緒出彭鏗夙號鍼神尤稱博士惟鸞坡虎觀世紹書  
籤故蘭葉椒花香生黛椀兩行錦字傳來贈嫠之篇五  
色霞牋咎就催妝之句啓琉璃之硯匣佳偶聯吟攀翡  
翠之鐙幃嬌兒自課昔年象服不矜蟬鬢之華今日荆  
釵詎類牛衣之瘁惜承歡之無路彌潔蘋蘩助相敬以  
如賓猶操巾櫛克勤克儉治及米鹽醯醬之微宜室宜

家慈周臧婢輝庖之末又不獨淋漓墨汁堪誇管氏夫  
人隱約眉峯當配秦川公子者矣茲者千逢元默君子  
年屆知非支值敦牂賢媛壽符大衍天數五地數五合  
稱百歲於一門夢維熊夢維虺早締良緣於初度丈人  
玉女雲中則巒岫相連金母木公海上則韶華競富每  
羨春前紫燕乳輒同時那知秋後紅蕖生原並蒂客星  
尙皎北山且映於南山庭樹將榮雛鳳應清於老鳳欣  
觀盛事可乏聲詩快遇休徵能無揚扈伏願襄陽耆舊  
洛下衣冠競吮仙毫交抽珎管仿歌芝於綺里響應丹  
山效咏絮於謝庭吟成白雪遂使千章錦句新排蜩蚪

之形還教六疊雲屏長照鴛鴦之影謹啓

徵兩浙詩存啓

蓋聞諸侯見志詠歌先珠玉之交太史陳詩篇什備輶  
軒之採標天南之巨鎮原在揚州論江左之風流多稱  
浙水連牛跨斗煥雲漢以分章帶越襟吳美江山而得  
助錢武肅射潮之地句應懷奇夏少康胙土之邦詞尤  
近古人人東箭不數隋珠戶戶南金詎誇荆璧以故江  
潮海日五言則鷺嶺神鷺雨柳花鐘七字則茗溪紙貴  
孕仙葩以振采映來射的峯前出硬語以盤空傳到平  
陵城下紅紗幕府領袖三羅春草池塘流連二謝邱遲

沈約紅芙蓉婉麗之辭秦系吳融晴雪洒清虛之臚凡  
茲咳唾量載難窮閱彼滄桑楷模勿替織殘弓服無煩  
集腋纔成畫徧旗亭何待披沙更揀方今

天子學冠百王心超萬類賡揚復旦堂階騰紉縵之華  
宜播南薰韶濩叶鏗鏘之韻惟是覃敷廣被謳頌彌隆  
矧承累洽重熙聲詩益盛登高能賦直通出日之鄉擊  
壤興歌徧及無龍之域十一郡鯨呿鼉鎗迴殊小國邨  
鄘百餘年霞蔚雲蒸大有專門李杜蘭臺諸彥發抒固  
鴻朗高華秋水伊人吐屬亦和平溫厚竭吳興之銀管  
難罄風騷傾剡水之篠箋猶餘陶寫吟壇棋布咸思鼓

吹休明朋社蟬聯靡不扶持正始僕也髫齡誦讀早解  
塗鴉暮齒推敲未成蠟鳳辨五音之正變近日忘勞審  
六義之精微嗜痂有癖尋章摘句時時樂此不疲暝寫  
晨書每每欣於所遇快賢人之星聚桑梓匪遙景前輩  
之風流敦槃如昨或燃藜學士巧圖尖叉或磨盾將軍  
險諧競病或潛踪仙釋酬唱於經臺丹鼎之旁或托跡  
漁樵著撰於竹嶼松坪之際賦雪來與柳往惆悵勞人  
咏螽趯而蟲嚶纏綿思婦然而張安世之書篋亡已經  
三庾開府之篇章存惟有五不爲鈔撮恐銷瑣屑於蛛  
絲勿事編摩終散劍光於煤尾覽諸家之偶錄惜窺約

而未全聆大雅之頻仍願調鯖而有合堂堂正正縱觀  
壁上旌旗炳炳麟麟暢觀林中茶火試推魯寶誰似璠  
璣漫笑齊人但知管晏倣劉氏史通之例不載前朝倣  
蕭家文選之編惟存逝者求才司馬詎無封禪之遺索  
解桓譚必有草元之賞助予象罔共結勝因使彼雞林  
佇觀善本所望相同臭味雙緘隨驛使之梅還期謬許  
宮商千里應雷門之鼓

招同人讌集王園啓

燕南趙北大有名區夏淺春深偏逢樂事魚鱗曲磴遙  
通金谷園中雁齒平橋斜接藍田莊裏趨韶光之滿眼



暗柳明花覺魚鳥之親人重山複水蕭蕭竹樹此閒別  
具烟霞落落亭臺到處都成圖畫著一雙之蠟屐何妨  
乘興而來厭十丈之紅塵誰不臨流而羨剡夫黃金臺  
下原多作賦之才銅馬門前不少思鄉之客茶檣酒幔  
夢尋吳越江山蘭坂松坪天闢夔龍邱壑維四月初逢  
四日指王園聊當西園雅集同人聿修勝社聽鸝館下  
一彈叔夜之琴鬪鴨欄前三弄桓伊之笛或素耽吟詠  
則琉璃硯匣攜來聯石鼎之詩或雅善文章則雲母花  
牋劈就製蘭亭之序賭圍碁於謝墅玉局縱橫抒長嘯  
於蘇門鸞陰上下不衫不履居然名士風流如鶴如霞

宛矣賢人星聚共風簷之辛苦樺燭三條合萍水以流  
連冰心一片豈必先通姓氏看題名在月殿前頭倘其  
許執鞭箠期再會到瀛洲深處

謝王香泉惠菱啓

花傳製鏡漢殿名高實著加籩周京品重紫莖外繞與  
雉尾以爭長素質中含似雞頭而並潔憶昔輞川渡口  
風色何嚴於今賀監湖邊歌聲猶峭惟此江鄉滋味最  
宜野老盤餐僕本散人偏多秋氣烹葵剥棗難充曼倩  
之饑沈李浮瓜未解相如之渴維其時矣四角方盈薄  
言采之扁舟將溯不圖嘉賓遽臨高朋攜來五柳門前

頽白三槐堂裏傾筐歷落一例新鮮破殼纏綿十分甘  
晚揆人饑口豈徒旣欲其生媿我殘牙轉恐苟爲不熟  
爰呼竈妾沃以清泉載命廚娘燂之翠釜膩如煨芋尙  
嫌吾舌非柔溫比蒸梨須識此心原熱老饕何幸領畧  
蜚鳴雁呌之天薄醉休辭消磨露白葭蒼之候

書

呈方樸山先生書

一違杖履八易寒暄馬帳曾游龍門轉隔煙霞獨造空  
歸蔗嶺之車風雨相招又阻錢塘之櫂將執經於何處  
雪盡冬三可問字兮爲誰腸廻日九老人星皎照來紫

瑞峯前高士風清吹到錦沙村  
畔惟老先生睥睨天南  
崢嶸斗北脂燃瞑夜同衛武之耄  
勤字寫秋蠅異伏生  
之口授去夏遇淳安王友得聞老  
先生掌教於新安之  
紫陽書院烏聊清歛秀助文瀾  
白嶽黃山高齊道岸瀝  
大江而南北人坐春風兼兩浙以  
東西學歸大治薪傳  
自宋後賢濟美於前賢法乳流今  
一指化成夫千指追  
思戒珠山頂題扇橋頭五言高手  
窺暮院之梧桐一賦  
狂生獻江洲之鸚鵡未嘗不睠懷  
函丈感舊雨之蕭蕭  
嘆息追隨感晨星之落落也藻素  
蒙噓拂甚荷栽培未  
盡述其生平姑畧陳夫近況彼夫  
畫衫鈿扇紛絲竹於

東山酒榭旗亭集賓朋於金谷調七菹於婁護梁肉盈  
溝成八繭之天孫羅紈委地則雖頑同木石甘稱沒字  
之碑縱使生等蜉蝣亦快守財之虜而乃廩虛紅粟負  
郭無田杖少青蚨買山何計庚且同呼其癸亥常兼困  
夫申典盡鷓鴣本非關於挽酒拾來搯柑亦何止於烹  
泉年年登避債之臺日日續送窮之句誰爲鮑叔知我  
之貧殊愧梁鴻因人而熱此其一也況當吳頭楚尾夢  
切趨庭江北淮南悲來陟岵踉蹌赴里空號永訣之天  
匍匐歸田頓失俱存之樂亭名望考風雨帷鐙寶重仁  
親晨昏枕塊泣蘋香於寒食一樹棠梨媿鶴語於瀧岡

三更華表大而送死送死難言小而養生養生無日此  
又其一也倘使無罹疾病氣可吞牛幸獲康寧力能格  
虎則讀父書而食舊德交國士以借他山克深嘗胆之  
艱詎畏仔肩之重柰何寸關俱弱負痼三年經絡全虛  
沈疴十月閉柴門而剝啄半是醫來傾藥汁以淋漓幾  
乎魄散悴屈原之顏色漁父驚疑瘦庾信之腰圍江關  
蕭瑟年華方壯同燭武之精亡婚嫁未完類盧蒲之髮  
短恐聞言而不信徒攬鏡以增憂藻今年三十有六矣  
憶從志學以來泊乎成人而後非規矩準繩之事不敢  
作非秦漢唐宋之文不欲觀誦先人之餘芬踐君子之

遺跡攜囊李賀常嘔血以成吟刺股蘇秦每焚膏而達旦溪逢夜雪往往乘舟徑掃晨花時時倒屣亦欲附清流殊俗狀早成頭角不愧科名耳詎意骨相偏屯命途多舛三戰竟遭夫三北七縱何有於七擒將翦彩以爲花非余所慕也然立門而操瑟是誰之過歟藏豹山深夢歎入天之翼屠龍技巧經輪千佛之名負長者之贈言低眉自惜羨達人之知命高枕無憂彼腦滿而腸肥容容受福此舌存而足刎咄咄書空文章報國問燕許兮爲誰邱壑置身任馬牛其呼我一樽清醕只澆漂母之墳滿路黃金孰買長門之賦栗里豈同於下里柴桑

竟等於翳桑難覓生涯何堪家食方將誓日滌腸呼天  
焚硯脫諸生之冠帶棄舉業之文章攜欽囊錐訪鴻都  
而從公子紅蓮綠水入上幕以作參軍或盾鼻以成篇  
或旄頭而草奏玉調李渥經綸周錢穀兵刑阮瑀陳琳  
筆札映山川社稷其品在不亢不卑之列其地當非隱  
非吏之閒緣餬口而志在四方不折腰而祿逾五斗英  
雄末路古豈其然衣食良圖今祇有此向枯桑以洒雨  
悴葉全蘇從涸轍以添波窮鱗頓活羹遺堂北少紆慈  
母之憂飯熟門東庶慰癡兒之索而乃愛我者惜半途  
之忽廢責我者戒一簣之未成仍以功名來相勸勉較



甘羅之攝政拜表原選比翁子之爲官採薪未晚生奇  
其數難信步於康莊天老其材或玉成於憂戚且行且  
止轉用狐疑何去何從幾煩龜卜嗟夫一編殘蠹竟成  
雞肋之形卅載虛聲空啖牛心之炙則夫重磨鐵杵伊  
唔四子之書又撥爐灰含咀八家之義住桑乾之河上  
風雪懷人羈督亢之城邊童蒙求我固已不堪回首無  
限錐心萱一落而一舒桐半生而半死冬缸夏簞朝朝  
濕司馬之青衫洲芷江籬處處怨西莊之紅豆矣然而  
尋樁模於梓里碩果猶存稽文獻於宗邦靈光獨出慙  
遺一老道雖大而能容矍鑠是翁文在茲而未喪倘顏

回之可鑄青眼應垂使宰我之可雕長城得倚登龍附  
驥果畱姓氏於名山屈蘧搏鵬那問炎涼於世路謹具  
窗課八十首索解人而殊少還質吾師因結習之未消  
敢繩大匠仰河邊之砥柱惟桓譚尤服揚雄悵爨下之  
枯桐非韓愈誰憐張籍文以載道書不盡言終賴揄揚  
曷勝依戀

傳

何蜀川傳

君諱沅字蜀川號湘南姓何氏蕭山人也其先世居廬  
江宋朝議大夫宗矩避元徙於蕭山之西河四世祖懋

遷第芹沂里其後爲監察御史者凡三葉柏臺烏府唐  
時諫議之官驄馬貂冠漢代侍中之職王謝則簪纓遽  
興崔盧則閥閱相望祖垣

授文林郎宰蓬萊高苑兩邑績載東省名宦志騰鳬舄  
於山郭試牛刀於海濱中牟魯恭羽毛感及桐鄉朱邑  
俎豆以之受宗錫太學生考授主簿

贈奉直大夫泰安府通判善承鴻業實創丕基積德詎  
止於身持籌不近於俗溫溫乎恂恂乎君子人也君游  
心惟古味道於腴詞章衍景福之篇經術紹公羊之籍  
青箱舊而世澤長白眉良而家道振早偕厥仲勤勵茲

學連鑣賢序競揚儒風當君弟淦之仕泰安也太夫人  
春秋高不能迎養畱君侍奉無魯仲由負米之事有東  
廣微循咳之詩逶迤板御咸稱潘岳家園宏敞養堂知  
是虞潭里第黃州之竹武昌之魚凡厥甘脆何歎盤匱  
送死重於養生慎終迨乎追逮起敬起孝罔有缺失言  
念手足載歌墳麓依依棣萼怕怕鴈行田荆芳而爨煙  
合謝草碧而池波融孝乎惟孝友於兄弟斯之謂矣有  
子一曰植太學生年不稱德中道云殂充間乏賢主器  
無長愛河難涸悲雲易深有孫三曰其美太學生曰其  
炎業儒曰其莢縣學生撫由童穉泊乎成人含餽飯後

鰒鳳盈巢課讀鐙前寶田多硯其慈於幼也又如此憶  
法護稱名之歲正維摩病劫之年腰圍瘦比休文形容  
槁同正則重門剝啄總屬醫來遼室捫揣無非藥裹乃  
於九死一生之後猶事五車三篋之勤玉軸縱橫牙籤  
左右流連文翰瞋寫晨音跌宕篇章鏘金鏗石赴省試  
屢躋遂援例貢入成均抱和氏而不遇懷隋侯而見遺  
登躡無梯柳榆有鬼而學業旣峻邱園豈卑今夫生長  
寒素則氣歉可恥服習富厚則氣盈可羞乃渭濱千畝  
不掛於齒頰謙卦六爻勿忘於寢興服御絕其紛華言  
動循於禮度以心制境人以爲難蓋履豐若儉者其性

定也居泰不驕者其養深也追太邱彥方之餘景慕平原孟嘗之遺躅慨當以慷慨施而且濟遂使孝子墓門保松楸而如故先人禋祀增猷畝以維新譜牒之輯亦與有功焉若夫就外傳者免分鄰壁之輝觀賓興者無慮囊錢之涇脫驂常及於朋儕彈鋏豈聞於門下緇袍之贈麥舟之貽至再至三不厭不倦偶從湖岸預卜泉臺詎効酒狂但隨畚鍤逢寒食於三月率家人而一游莊周夢覺陶潛生挽曠懷雅尚同歟異歟庚寅爲君六十壽辰方瞻南極之光轉觸西河之淚稱觴膝下有媳無兒戲彩庭前以孫代子君之語也不亦痛乎明年疾作

功臣閣圯空傳避瘴之區少微星沈偏有憂人之事龍  
蛇已值於歲月砭鍼何及於膏肓生也有涯百年俄頃  
良可惜也然而步履醇謹情懷淡泊推解善於宗黨孝  
友竭於庭闈和煦盈於同氣伉儷偕於白頭攸好之德  
克底全歸易簀之時猶聞治命可謂人倫模楷無憾平  
生矣矧夫優龍劣豹佑啓後昆芳蘭秀芝克篤前烈令  
聞令望有葉有年也哉旣逝之七載文孫其莖過泊鷗  
嶺山陽之笛陳根不哭悲涼子敬之琴挂劍樹高招魂  
巷近敢辭荒落爰寫儀型

贊曰廬江故家固陵望族誕生吉人棄華務樸明星在  
東攤書校讎綆長汲短鐘鳴未休躬不降康心無負  
詎嗟半生長逢藥曰爲善最樂拳拳服膺貽謀孫子祖  
武克繩易不云乎必有餘慶松蓋雖凋槐陰方盛水部  
官閣將軍園林何如豹隱秩秩德音匪傳斯傳可徵惟  
傳昭示來茲式此邦彥

贈奉政大夫雲南府同知源長胡公傳

公諱祿安字源長蕭山人也自昔璜壁頒陳孝廉舉漢  
扶瓊鳩者香山尙其齒擁皋比者吳興沐其教胡之先  
稱極盛焉嗣由山陰之張謇遷徙於蕭人多禮讓等楊



氏之關西地處幽閒近徐公之城北祖其廉公爲四川  
富順尉旋署邑篆有政聲父先春公邑庠生樂道則非  
飲一瓢職胥則亡書三篋循趨庭之職隨侍於官爾乃  
蒼鶩召鬻銅馬流妖揚塵而天漢迷青壑血而郊原映  
赭麟蛇紛鬪殤魂盈廣漢之城魚水爭飛鬼火亂平林  
之岸崇禎甲申九月富順陷顏杲卿之罵賊舌豈能存  
張睢陽之守陴齒何足惜其廉公死之先春公亦被難  
父子殞身忠孝俱盡五丁開道難歸連尹之尸千嶂橫  
雲只映東平之樹公以國學生考授州判以子貴贈奉  
政大夫儀表冬松懷抱秋水幼擅稱象之智長有漂麥

之勤踪跡則羅隱方干筆札則陳琳阮瑀蓴羹菰飯烏  
蓬載酒於湘湖明月清風白恰尋花於古寺所不幸者  
當富順糜爛之日正懷宗殂落之年風饕何怒滅南內  
之春鐙日瘦無光冷空山之朱履震兩京而灰劫喚鶴  
偏多厄四鎮於唇亡搖烽猶警公與母氏沃太孺人傳  
信傳疑如夢如醉七千餘里空約刀環三十六鱗難通  
尺素吁其甚矣傷如之何旣而

興朝受命

王師寧爾野無伏莽路有行人公誓葬祖父隻身而前  
復恐沃太孺人指爲畏途憐其少子長安賣藥水相如

之贗語平陵敗綵亦莊周之寓言險陟夔江灘鳴似釜  
危梯秦棧雪舞如鴉囊空羞澁之錢途值抑掄之鬼艱  
難萬狀羈旅同悲豈知屠腸抉腦之區已多變谷遷陵  
之感燒砂句漏全非昔日琴鳧哦竹藍田問是誰家門  
戶樂村故隸述彼前因洛邑頑民陳其遺跡公聞言之  
下一慟而絕良久乃甦五溪舊服與忠憐而並銷三峽  
哀猿應孤兒而齊叫匍匐歸里沃太孺人覺母子復大  
慟鄰閭遠近罷社停春十餘年而母氏率公每飯不忘  
只有吞聲之泣我辰安在從無笑口之開鬱鬱數十年  
年七十九歲而終和嶠之生孝盡禮王戎之死孝滅性

兼而有之夫何媿焉況夫看雲眼老捫虱談雄田荆與  
李萼爭輝徐劒共范袍相映濟南伏勝齒牙激兵火殘  
書商山夏黃鬚鬢帶烟霞奇氣才兼乎識倚之者爲翼  
爲馮德重於年望之者如龍如鶴豈獨五步之內挹其  
芬芳十室之中稱其忠信哉配誥封宜人趙氏平原華  
族清獻名門贈光祿大夫之鼎之女原任廣東高雷廉  
等處總兵官文璧之姊謝道韞之伯叔江左能文班惠  
昭之弟兄玉關耀武端莊淑慎勤而不荒儉而有禮克  
相夫子家政用修子三人爲雲南司馬名瀚者乃其冢  
君也曰顯宗曰振宗皆高尚不仕云公歿之三十五年

文孫政華屬元藻爲之傳藻之大母實公之長女義不能辭嗚呼夕陽山下一椽冀缺之廬黃葉村中三尺嚴光之墓李令伯不忘祖母時過劉門陳太邱宜製碑文媿非邕筆附登家乘備採輶軒